

137. [El Cid advierte a los suyos; rehúsa sentarse a lado del rey; demanda reparación civil y gana el pleito]

Suelta fue la missa antes que saliesse el sol
e su ofrenda han fecha muy buena e conplida.
-Vós, Minaya Álbar Fáñez, el mio braço mejor,
vós iredes comigo e el obispo don Jerónimo
e Pero Vermúez e aqueste Muño Gustioz,
e Martín Antolínez, el burgalés de pro, e Álbar Álbarez e Álbar Salvadórez
e Martín Muñoz, que en buen punto nació
e mio sobrino, Félez Muñoz,
comigo irá Malanda, que es bien sabidor,
e Galind Garçiez, el bueno d'Aragón,
con éstos cúnplanse çiento de los buenos que í son.
Velmezes vestidos por sufrir las guarnizones,
de suso las lorigas tan blancas commo el sol,
sobre las lorigas armiños e pelliçones,
e que non parescan las armas, bien presos los cordones,
so los mantos las espadas, dulçes e tajadores,
d'aquesta guisa quiero ir a la cort,
por demandar mios derechos e dezir mi razón.
Si desobra buscaren ifantes de Carrión,
do tales çiento tovier, bien será sin pavor.-
Respondieron todos, -Nós esso queremos, señor.-
Assí commo lo á dicho, todos adobados son.
Nos'detiene por nada el que en buen ora nació,
calças de buen paño en sus camas metió,
sobr'ellas unos çapatos que a grant huebra son,
vistió camisa de rançal, tan blanca commo el sol,
con oro e con plata todas las presas son,
al puño bien están, ca él se lo mandó,
sobr'ella un brial primo de çiclatón,
obrado es con oro, pareçen por o son,
sobr'esto una piel vermeja, las bandas d'oro son,
siempre la viste mio Çid el Campeador,
una cofia sobre los pelos d'un escarín de pro,
con oro es obrada, fecha por razón
que non le contalassen los pelos al buen Çid Canpeador,
la barba avié luenga e prísola con el cordón,
por tal lo faze esto que recabdar quiere todo lo suyo,
de suso cubrió un manto que es de grant valor,
en él abrién que ver quantos que í son.
Con aquestos çiento que adobar mandó,
apriessa cavalga, de San Serván salió.
Assí iva mio Çid adobado a lla cort,
a la puerta de fuera descavalga a sabor,
cuerdamientre entra mio Çid con todos los sos,
él va en medio e los çiento aderredor.

Quando lo vieron entrar al que en buen ora nació,
levantós' en pie el buen rey don Alfonso
e el conde don Anrrich e el conde don Remont
e desí adelant, sabet, todos los otros,
a grant ondra lo reçiben al que en buen ora nació.Nos' quiso levantar el Crespo de Grañón
nin todos los del bando de ifantes de Carrión.
El rey dixo al Çid, -Venid acá ser, Campeador,
en aqueste escaño quem' diestes vós en don,
maguer que a algunos pesa, mejor sodes que nós.
Essora dixo muchas merçedes el que Valençia gañó,
-Sed en vuestro escaño commo rey e señor,
acá posaré con todos aquestos mios.-
Lo que dixo el Çid al rey plogo de coraçón.
En un escaño torniño essora mio Çid posó,
los çiento que l'aguardan posan aderredor.
Catando están a mio Çid quantos ha en la cort,
a la barba que avié luenga e presa con el cordón,
en sos aguisamientos bien semeja varón,
nol' pueden catar de vergüença ifantes de Carrión.
Essora se levó en pie el buen rey don Alfonso,
-Oíd mesnadas, sí vos vala el Criador.
Yo, de que fu rey, non fiz más de dos cortes,
la una fue en Burgos e la otra en Carrión,
esta tercera a Toledo la vin fer oy
por el amor de mio Çid, el que en buen ora nació
que reçiba derecho de ifantes de Carrión.
Grande tuerto le han tenido, sabémoslo todos nós,
alcaldes sean d'esto el conde don Anrrich e el conde don Remond
e estos otros condes que del vando non sodes.
Todos meted í mientes, ca sodes coñosçedores,
por escoger el derecho, ca tuerto non mando yo.
D'ella e d'ella part en paz seamos oy,
juro par Sant Esidro, el que bolviere mi cort
quitarme á el reino, perderá mi amor.
Con el que toviere derecho, yo d'essa parte me só.
Agora demande mio Çid el Campeador,
sabremos qué responden ifantes de Carrión.-
Mio Çid la mano besó al rey e en pie se levantó,
-Mucho vos lo gradesco, commo a rey e a señor,
por quanto esta cort fiziestes por mi amor.
Esto les demando a ifantes de Carrión,
por mis fijas quem' dexaron yo non he desonor,
ca vós las casastes, rey, sabredes qué fer oy,
mas quando sacaron mis fijas de Valençia la mayor,
yo bien las quería d'alma e de coraçón,
diles dos espadas, a Colada e a Tizón,
ésta yo las gané a guisa de varón,
que s'ondrassen con ellas e sirviessen a vós.
Quando dexaron mis fijas en el robredo de Corpes,comigo non quisieron aver nada e perdieron mi amor,
denme mis espadas quando mios yernos non son.-